

# Wulf Wagers wunderliche Weltbetrachtung

## Rentnerentsorgung

Jeder weiß ja inzwischen, dass unser Xellschaft emmr äldr wird. Ond die ganze Rentner muass jo die arbeitende Bevölkerung vrhalta. Des wird auf Dauer scho a finanzielles Problem em Staatshaushalt werda. Aber des, was der fleißige Leser von meira Kolumne, dr Herr H. aus Waldabuch mir die Däg gschickt hot, fend i wirklich net en Ordnung.

En ma Tierfutterlada hot er für da Jagdhond von seim Sohn Floischbüchsa hola wella, damit der net vom selba fällt. Ond wie er vor dem Regal mit dene Büchsa stoht, trifft ehn schiergar da Schlag. Denn uf dene Dosa stoht jo emmr druf, was drenn isch. Aber stellat Se sich amol



vor, was do uf oiner Dos en dem Regal drufgstanda ischt: Kennerfleisch Senior + Huhn. Reich an Ballaststoffen.

Net bloß zwoimol hot der Herr H. aus Waldabuch uf des Etikett guckt, ob des stemma ka. Zom Beweis hot er glei a Biddle gmacht.

Jetzt muass ma sich nadierlich froga was des bedeuta soll. Dr Herr H. hot uf jedenfall amol an die Firma gschriebe, ob sie denn Zuschüsse von dr Bundesregierung kriegat, wenn se für e sachgerechte Rentnerbeseitigung sorgat. Also Sacha geit's ...

Bis näggschd Woch'

Ihr  
Wulf Wager

*Alle Kolumnen zum Nachlesen unter: [www.woascht.de](http://www.woascht.de)*